

内田不賢書 酒井孫兵衛鐫

第五節 占部用水路改修

⑤ 占部用水碑（所在地 岡崎市正名町中之切）



占部用水碑

凡起事業者非捨一身之利而謀衆庶之益則不能遺功於百世今見之鮮矣而求之於古則有其人焉碧海郡占部鄉古昔三河守護職宿禰平麻呂居茲始闢荒蕪起新田撫恤鄉民鄉民思慕之建祠祀之即占部神社是也後分爲四村曰正名曰定國曰中村曰國正然地形乾燥未得用水之利村民憂之者久至慶長年間野本新十郎渡邊彌藏慨然奮起欲開鑿水路導矢作川之水灌四村之田請之於岡崎藩然自矢作川至四村殆二里許左右堤防要數地者凡六町二反六畝餘沿道村民惜喪其地又恐生水害異議沮之於是二氏往江戶請之於幕府又歸村慰諭沮之者東奔西走周旋最苦經六年其議始諧官允其請實慶長八年四月十五日也其間鉅費雖四村出之而不足充之二氏負之遂至喪世襲之田及宅地一家殆蕩盡而欣然無悔色無幾而水路之功成稱之占部川四村之田因之占灌漑之利收豐稔之功衆民感泣仰二氏如父母以每年六月十六日設追祀之典以爲恒例其後分之供引用者凡四西手分水也宮地分水也野畑分水也高須分水也於是其利之及他村者愈廣矣然而本流堤防最脆而低一朝大雨川東之惡水合流乎此汎濫於沿川耕地而旱則分水之用亦不能飽於注入以是村民常不免旱雨之二害明治十六年懸令國貞廉平君命土木課長黒川治愿改設閘門高堅堤防更開鑿新渠分爲數派或設樋管或施架筧築堤導水以供灌田疏惡水者不逞具舉又自本川流末渡筧於廣田川宜達幡豆郡永野村於是曩之二害全除而灌漑之澤延覃於碧海額田幡豆三郡之內二十六村顧占部川一帶支流也而其利之大如此是雖繇改修使然而非有往昔野本渡邊二氏之創業焉能得至於此乎閱舊誌占部六郎季武之裔至野本新平從德川氏屢有戰功其子乃野本新十郎也渡邊綱之裔滿綱仕足利氏有功領三河占部莊其末孫乃渡邊彌藏也嗚呼二氏果非尋常農家宜乎忘己破產而遺衆庶之利於百世此非所謂古有其人者乎四村之民不忘基本欲立碑以傳不朽來乞余撰文乃探其源委溯於二氏之功者如此

明治十八年歲次乙酉三月

愛知縣令從五位勝間田稔題額

竹嶋飯田俊 撰

南厓飯沼守一書